

UMNO Sabah rayu Dr. Mahathir jangan perkecil kepimpinan parti

Um - 16/11/2006
KUALA LUMPUR 15 Nov. -
UMNO Sabah merayu Tun Dr. Mahathir Mohamad menghentikan tindakannya memperkecil-kecilkan keupayaan kepimpinan parti itu sekarang.

Wakilnya, Datuk Tawfiq Abu Bakar Titingan berkata, UMNO negeri berasa sedih dengan kemelut antara bekas Perdana Menteri dengan Presiden UMNO, Datuk Seri Abdullah Ahmad Badawi.

Beliau yakin UMNO tidak akan mudah digoyang atau digoncang oleh mana-mana individu mahupun kumpulan yang datang dari luar parti.

"Apa yang menyedihkan, usaha-usaha sumbang itu datangnya dari dalam parti sendiri dan sudah pasti ia akan memberi kesan yang mendalam dan berpanjangan.

"Ia boleh menjejaskan keutuhan parti dan perpaduan ahli sekiranya tidak ditangani dengan ketegasan dan berhemah," katanya ketika membentangkan usul ucapan dasar Presiden pada Perhimpunan Agung UMNO 2006 di Pusat Dagangan Dunia Putra (PWTC) di sini hari ini.

Tawfiq yang juga Ketua UMNO Bahagian Tawau berkata, UMNO Sabah taat setia dan menyokong penuh kepimpinan Abdullah selaku Presiden dan Perdana Menteri.

Beliau turut memohon Timbalan Presiden yang juga Timbalan Perdana Menteri, Datuk Seri Najib Tun Razak serta kepimpinan UMNO terus bersatu hati membantu Presiden.